




# კავკასიის ეკონომიკის ყოველთვიური მიმოხილვა

ივნისი 2023






სამხრეთ კავკასიაში 2022 წელს არსებული მაღალი ეკონომიკური ზრდის და ინფლაციის ტემპი მიმდინარე წლიდან შემცირებულია. 2023 წლის პირველი სამი თვის მდგომარეობით, კავკასიის ეკონომიკის ზრდა 4.4%-ია, სადაც გამორჩეული ქვეყანა სომხეთია. ამ უკანასკნელში ზრდა ორნიშნა მაჩვენებელზე ნარჩუნდება. ორნიშნა მაჩვენებელზე რჩება აზერბაიჯანში ინფლაცია, ხოლო საქართველოსა და სომხეთში თვალსაჩინოდ შემცირებულია. ამ პირობებში აზერბაიჯანის ცენტრალური ბანკი მონეტარულ პოლიტიკას ამკაცრებს, ხოლო საქართველოში პოლიტიკის შერბილება დაიწყო. სომხეთში კი მონეტარული პოლიტიკა უცვლელია.

## ეკონომიკური ზრდა

ბოლო ათწლეულში კავკასიის საშუალო წლიური ზრდა 2.9% იყო. პანდემიის პირველ წელს რეგიონის ეკონომიკა 5.5%-ით შემცირდა. მომდევნო ორი წელს კი აღდგენის სწრაფი ტემპი იყო. 2021 წელს კავკასიის ეკონომიკური ზრდა 7.2%-ს შეადგენდა, რაც 2022 წელს 7.8% იყო. გასული წელს მაღალი ზრდით სომხეთი და საქართველო გამოირჩეოდა.

სომხეთში ეკონომიკა 14.2%-ით გაიზარდა, ხოლო საქართველოში 10.1%-ით. ამ ქვეყნების ზრდაში არსებითი წვლილი რუსეთიდან მიგრანტებმა და შესაბამისად, ფინანსურმა ნაკადებმა ითამაშა. 2022 წელს აზერბაიჯანის ეკონომიკა 4.6%-ით გაიზარდა. მიმდინარე წლის პირველს ოთხ თვეში კავკასიის საშუალო ზრდა 4.4%-ია, რაც იანვარ-მარტში 4.5% იყო.



ამ პერიოდში, ზრდის შედარებით მაღალი ნიშნული სომხეთშია. ამ უკანასკნელის ზრდა 12.2%-ს შეადგენს. აპრილი სომხეთის ეკონომიკა 12.1%-ით გაიზარდა. ზრდაში განსაკუთრებული წვლილი სავაჭრო სექტორს გააჩნდა, რომელიც სომხეთის ეკონომიკის არსებითი ნაწილია. აპრილში, წინა წლის ანალოგიურ პერიოდთან შედარებით, სავაჭრო ბრუნვა 28.9%-ით გაიზარდა, ხოლო მშენებლობის სექტორის ზრდა 19.6%-ს შეადგენს. იანვარ-აპრილში საქართველოს ეკონომიკის საშუალო ზრდამ 7.3% შეადგინა. აპრილში ზრდის ნიშნული 7.5% იყო. მიმდინარე წლის მეოთხე თვეს ზრდის ტემპი გაზრდილია.

ასევე, საქართველოშიც დადებითი კონტრიბუცია სავაჭრო და სამშენებლო სექტორებს გააჩნდა. მიმდინარე პერიოდში აზერბაიჯანის ეკონომიკა დაბალი ზრდით ხასიათდება. იანვარ-აპრილში, წინა წელთან შედარებით, ეკონომიკა მხოლოდ 0.1%-ით არის გაზრდილი. თუმცა, ნავთობისა და გაზის ინდუსტრიის გარეშე, სხვა დანარჩენი სექტორების ზრდა შედარებით მაღალი, 3.1%-ია. ეს სექტორები კი მთლიანი ეკონომიკის 56.7%-ია. თავად ნავთობისა და გაზის ინდუსტრიაში არასახარბიელო მდგომარეობა ამ უკანასკნელზე ფასების მკვეთრ ვარდნას უკავშირდება. შედეგად, ამ სექტორში დამატებული ღირებულება 2.4%-ით შემცირდა.


## სამომხმარებლო ფასები

ბოლო ათწლეულში სამხრეთ კავკასიის ქვეყნების ინფლაციის დონე განსხვავებულია. 2013-22 წლებში საშუალო წლიური ინფლაცია აზერბაიჯანში 6.0% იყო, ხოლო საქართველოში - 4.9%. ამ პერიოდში ინფლაციის დაბალი ნიშნული, საშუალოდ 3.3%, სომხეთში იყო. 2022 წელსაც სამომხმარებლო ფასების ზრდა საშუალოდ 8.5%-ს შეადგენდა. აზერბაიჯანსა და საქართველოში 12.2% და 11.9% -ები იყო.



# კვლევითი ინსტიტუტი - Gnomon Wise


მიმდინარე წელს კავკასიის ქვეყნებში ინფლაციის ტემპი შემცირებულია. მაისში სომხეთში წლიურმა ინფლაციამ 1.3% შეადგინა, რაც აპრილთან შედარებით, 1.9 პროცენტული პუნქტით ნაკლებია. ამ პერიოდში, საქართველოში ინფლაცია 1.5%-ია, რომელიც წინა თვესთან შედარებით, 1.2 პროცენტული პუნქტით არის შემცირებული. აზერბაიჯანში კი ინფლაცია კვლავ ორნიშნა რჩება. მაისში სამომხმარებლო ფასების წლიური ზრდა 11.5% იყო. აპრილში -12.8%.



## მონეტარული პოლიტიკა

ბოლო წლებში მაღალი ინფლაციის საპასუხოდ, ცენტრალურმა ბანკებმა რეაგირება სხვადასხვა დროს და მასშტაბით დაიწყეს.

სომხეთში მონეტარული პოლიტიკის გამკაცრება ჯერ კიდევ 2021 წლის მაისში დაიწყო, როცა განაკვეთი 5.5%-იდან 6.0%-მდე გაიზარდა. ამ პერიოდიდან სომხეთის ცენტრალური ბანკი პოლიტიკის განაკვეთს ინტენსიურად ზრდიდა, რაც 2022 წლის ბოლოს უკვე 10.75% იყო. ცენტრალურ ბანკში ბოლო გადაწყვეტილება განაკვეთზე 2023 წლის მაისში იყო, სადაც პოლიტიკა უცვლელი დარჩა.



საქართველოში მონეტარული განაკვეთის გამკაცრება 2021 წლის აგვისტოში დაიწყო. ამ დროს განაკვეთი 9.5%-დან 10.0%-მდე გაიზარდა. მომდევნო ზრდა 2021 წლის დეკემბერში, 10.5%-მდე იყო. 2022 წლის მარტიდან 2023 წლის მარტამდე პოლიტიკის განაკვეთი უცვლელად, 11.0%-ზე ნარჩუნდებოდა. ეროვნულ ბანკის ბოლო, 10 მაისის სხდომაზე პოლიტიკა 10.5%-მდე შემსუბუქდა. მორიგი სხდომა 21 ივნისს გაიმართება.

აზერბაიჯანის ცენტრალური ბანკი პოლიტიკის გამკაცრებისგან თავს იკავებდა. ხანგრძლივი პერიოდის შემდეგ, 2021 წლის ოქტომბერში განაკვეთი 6.25%-დან 7.0%-მდე გაიზარდა. 2022 წლის დეკემბრიდან რეფინანსირების ზრდა დაიწყო, რომელიც ბოლო, 3 მაისს 9.0%-მდე გაიზარდა. ბანკის მმართველთა საბჭო მომდევნო გადაწყვეტილების მისაღებად 21 ივნისს შეიკრიბება.

# კვლევითი ინსტიტუტი - Gnomon Wise

## ვინ ვართ

Gnomon Wise საქართველოს უნივერსიტეტთან არსებული დამოუკიდებელი კვლევითი ინსტიტუტია. ჩვენი გუნდი დემოკრატიული ღირებულებების მქონე, სხვადასხვა კვალიფიკაციის, გამოცდილ მკვლევრებს აერთიანებს. გუნდის თითოეულ წევრს ღრმად გვწამს, რომ ჩვენ მიერ კეთილსინდისიერად წარმოებული ცოდნით, ვაძლიერებთ ინდივიდს და შესაბამისად, ხელს ვუწყობთ კაცობრიობის კეთილდღეობას.

## რას ვაკეთებთ

ჩვენ ვაწარმოებთ სიღრმისეულ, მრავალმხრივ ცოდნას და უზრუნველვყოფთ მის სათანადო გავრცელებას. ქვეყნის დემოკრატიული განვითარების მიზნით, ხელს ვუწყობთ საჯარო პოლიტიკაში აკადემიური სივრცის როლისა და საზოგადოების ჩართულობის ზრდას, რითაც ცოდნაზე დამყარებულ, საზოგადოებაზე ორიენტირებული გადაწყვეტილებების მიღების პროცესს ვახალისებთ.

ჩვენ ვცვლით იდეებს და ამავდროულად, საზოგადოების თითოეულ წევრს ვაძლევთ საშუალებას თავადაც იყოს იდეათა ბაზრის მნიშვნელოვანი კონტრიბუტორი.

## როგორ ვაკეთებთ

დამოუკიდებლად ან ადგილობრივი თუ საერთაშორისო ექსპერტების დახმარებით, ჩვენ ვაწარმოებთ აკადემიურ და გამოყენებით კვლევებს, ანგარიშებს, ანალიტიკურ დოკუმენტებს. სამთავრობო უწყებების, არასამთავრობო ორგანიზაციების და სხვა ინტერესთა ჯგუფების ჩართულობით, შევიძუშავებთ პოლიტიკის დოკუმენტებსა და რეკომენდაციებს. იდეათა გაცვლის მიზნით, ორგანიზებას ვუწევთ კონფერენციებსა და დისკუსიებს.

[www.gnomonwise.org](http://www.gnomonwise.org)



[info@gnomonwise.org](mailto:info@gnomonwise.org)